

國家圖書館藏

稀見明史史籍輯存

線裝書局

明右史略卷之十一

海虞馮復京嗣宗撰

太祖十一

壬戌洪武十五年

正月辛巳朔始用重制九奏侑食樂章曹震王弼

師至威楚路故元平章閻乃馬歹等降壬午元曲

靖宣慰司中慶澂江武定三路嵩明等七州昆明等

六縣達魯花赤皆詣玉英軍獻符印降甲申始制

諸司勘合其制以空冊合空紙之半編寫字號用內
府關防印識之右半在冊左半在紙冊付布按都司
直隸府州衛所紙藏內府凡府部文移於內府領紙
填書所行之事下所司以冊合其字號印文相同則
行之謂之半印勘合以防欺弊 丙戌上以元人無
文字發施^號令但借高昌書製蒙古字行之乃命翰林
以華言譯其語復取元秘史參考以切其音既成詔
板行之自是使臣往來朔漠皆能得其情 丁亥置

貴州都指揮使司命平涼侯費聚汝南侯梅思祖署
其事 庚寅免開封前年稅糧河決故 乙未趙庸
平東筦盜甲辰破石鼓赤嶺諸寨禽偽官百餘人賊
萬餘人斬首三千級 丁未白虹貫日 庚戌命天
下朝覲官各舉所知一人 是月趙庸討平龍川潮
州亂民李元帥曾名用 宣德侯金朝興駐師臨安
元右丞兀卜台等降 二月壬子命駙馬李騏賑河
南飢 癸丑置雲南都指揮使司乙卯置雲南布政
司

司以梅思祖平章潘允明署布政事甲戌劉仲質
爲禮書乙亥定雲南中鹽例是月禮書高信致
仕閏二月甲申趙庸討平陽山歸善等縣蠻寇又
克燈心龍湖龍歸等寨禽賊首都公少公等斬千餘
級招降二千餘戶俘賊首鏟平王者至京癸卯藍
玉沐英進攻大理大理城倚點蒼山西臨洱河爲固
土酋段世聞王師且至扼下關以守下關者南詔皮
羅閣所築龍尾關也玉等至品甸遣定遠侯王弼以

兵由汧水東趨上關爲犄角勢自率眾抵下關造攻
具遣都督胡海夜四鼓由石門閒道渡河繞出點蒼
山後攀木援岸而上立我旗幟昧爽我軍抵下關者
望之踴躍譟譟酋眾驚亂沐英身先士卒策馬渡河
水沒馬腹將士隨之莫敢後遂斬關而入山上軍望
見亦下攻之酋兵腹背受敵遂潰拔其城擒段世乃
分兵取鶴慶略麗江破石門關下金齒由是車里平
緬等處相率來降諸夷悉平

三月丙辰改國子學

爲國子監致仕中府督僉陳清卒業縣人從上克
金陵取淮浙湖廣江西皆有功嘗捕倭多所俘斬贈
合浦侯 癸亥命南雄侯趙庸籍廣州蛋戶萬人爲
水軍 丙寅以工侍郎趙俊爲工書試吏侍郎李信
爲吏書 庚午河決朝邑縣 是月吏書阮駿致仕
四月辛巳廉州府巡檢王德亨上言家本階州介
偏西戎有水銀坑冶及青綠紫泥願得兵取其地以
歸于朝上以爭利啓釁不聽 丙戌詔天下通祀孔

子定學田三等府學千石州學八百石縣學六百石
應天府學千六百石師生月給廩膳米一石教官俸
如故 壬辰免浙江江西河南山東直隸稅糧 乙
未改儀鸞司爲錦衣衛 丙申更定左右春坊官制
遂爲永式 己亥烏撒諸蠻復叛 癸卯故元臣名
祖自遼東來歸言俗尚禮教有高希鳳者爲亂兵所
殺妻劉被掠罵賊死希鳳弟藥師奴亦死于亂兵妻
李攜子姪避難度不兩全以子差長棄之獨攜姪行

及混一復業訪得其子同守夫墓其季弟伯顏不花
爲納哈出所殺妻郭自經于馬櫪從子塔失丁爲讎
陷死妻金與姑刑縊死魚塢居室又言定遼南河寨
有裴鐵疫死妻李晝夜哭臨葬日祭畢縊于屋西桑
樹上爲動容稱歎卽詔有司旌表希鳳家爲五節婦
之門亦旌裴鐵門曰貞節 是月西堡蠻賊寇保定
守將顧成擊敗之 五月己酉朔皇嫡長孫雄英卒
進封虞王諡曰懷 癸卯王範爲大理卿 乙丑國

璋按癸卯干支
誤

子監新成上臨幸謁孔子行釋菜禮 癸酉文學郭

允道爲戶書 丙子廣平府吏王允道言磁州臨水

鎮產鐵元于此置鐵冶都提舉司總轄沙窩等八冶

爐丁萬五千戶歲收鐵百萬餘斤請如舊置之上曰

利不在官則在民今治鐵尚多軍需不乏而民生業

已定若重設此是驅萬五千家於鐵冶之中也杖之

流海外 是月以遼東餉卒航海多溺死命議屯田

之法 刑書王時降戶部郎中坐妄提史靈 六月

芝大誥六

月台史學卷十一

五

世多堂

日不月是

丁

癸未置大渡河守禦千戶所 乙酉命按察司選生
員年二十以上有志學問者送京師 辛卯使諭安
陸侯吳復平涼侯費聚曰符到可疾報征南三將軍
凡烏撒烏蒙東川芒部磐石關索嶺諸蠻悉蕩除之
以安陸總兵平涼副之會兵攻諸砦若通關索路慎
勿戰嶺上當分襲賊巢令各自救不暇其旁土寨卽
未下俟三將軍軍至并力 七月壬子河溢陽武榮
澤二縣 甲子賜京衛征南軍家屬鈔乙巳賜和陽

璋按乙巳疑己巳

等衛征南軍家屬鈔 乙亥以前國子助教開濟試
刑書 沐英自大理還軍滇池會友德兵進攻烏撒
大敗其眾斬首三萬餘級獲馬牛羊萬計餘眾遁遣
兵追捕 是月蘄春侯康鐸宣德侯金朝興卒鐸年
十歲以父功封侯侍太子讀書大本堂長督民墾田
鳳陽征辰州獠平松疊諸州從徐將軍征胡皆有功
及從傅將軍征雲南克普定破楚山等砦卒于軍追
封如父諡忠愍子幼未封洪武二十六年停襲朝興

日不月

十一

一

巢人巢湖來歸從上渡江至克漢吳又從征中原定
元都征山西宣府伐夏領東道兵征迤北取和林征
西番俘斬數萬獲馬二萬牛羊駝二十萬得鄰七站
十二年封侯世指揮使至是從征雲南建昌至會川
卒年五十二贈沂國公子鎮十七年論平雲南功予
世券嗣侯二十三年黨事奪封八月丁丑朔詔禮
部設科取士三年一試著爲定例辛巳設學校卧
碑丙戌皇后馬氏崩后宿州閔子鄉人父馬公與

郭子興善后以至順壬申七月十八日生母鄭早卒
子興撫以配上嘗自忍飢懷糗餌奉上上渡江后亦
帥諸將妻妾至太平及居建康率諸嬪御完緝衣履
助給將士龍灣之役悉發宮中金帛充賞士咸感奮
及用爲后服大練浣濯之衣勤苦如平生訓勅諸王
恩逮羣妃有子者待之加異上初克和州參軍郭景
祥守其子犯法上將加刑后曰景祥止一子可念也
得免李文忠守嚴州爲郎中楊憲所閒后曰文忠恩

日不多見

十一

一

信素行臨敵易將兵家所忌上任文忠如故宮人有
 過上怒后亦怒遽命宮正治其罪乃多全活者勸上
 裕民間畜積存給中朝官給國子生月廩贍其家上
 皆從之上嘗發死囚築京城贖罪后曰疲苦之囚更
 加勞役此求其生而適殺之也上卽令罷役其隨事
 匡救多所裨益皆此類也后疾力止禱祠崩年五十
 一上哀慟終身不復立后生五子寧國安慶二公主
 庚寅賜廬州等衛征南家屬鈔軍 乙未遣使諭友

德等曰得報知永昌侯駐軍建昌大軍已破烏撒次第搜捕林箐諸蠻然此地山高道險非眾不克宜并永昌平涼安陸三侯王張郭三都督軍爲一自七星關來者又云芒部烏撒之蠻夜挈家歸靄翠符至可諭靄翠縛送軍前其關索嶺非古道古道在西北啓闢以接普定則芒部酋長必獲將軍其熟圖之丁酉秀才曾泰爲戶部尚書初上徵賢良方正聰明正直孝弟力田文學之士列置郡縣復以官不得人

聘天下秀才至者數千辛丑命刑書開濟等定議考
試濟等條上大指言宜選文武大僚有才識者公暇
延問諸生以經明行修工習文詞通曉四書人品俊
秀言有條理曉達治道分爲六科皆備者爲上又令
京官於秀才內各舉所知舉中者受賞不當者罰及
舉主秀才多郡縣一時推舉未諳政務堪用者止量
才授職勿加重任所謂孝弟力田聰明正直諸科悉
宜罷舉議上從之壬寅秦晉燕周楚五王奔喪至